



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Ispesyal nga Isyu
Disyembre 26, 2007
www.philippinerevolution.org

Padasigon ang rebolusyonaryo nga pagsulong sang PKP para sa pagselebrar sang ika-40 anibersaryo sini


*Mensahe sang Komite Sentral
sang Partido Komunista sang Pilipinas*

Walay tupong ang kasadya naton sa pagsaulog sang ika-39 nga anibersaryo sang liwat nga pagtukod sang Partido Komunista sang Pilipinas (PKP) sa teoritiko nga ubay sang Marxismo-Leninismo-Kaisipang Mao Zedong (Maoismo) sadtong Disyembre 26, 1968. Umpisa sadto, ang pinakamahal naton nga Partido napanday sa kalayo sang rebolusyonaryo nga paghimakas kag nakatipon sang mabulawanon nga kadalag-an sa pagtungod sini bilang abante nga gwardya sang proletaryado kag sa pagpamuno sa paghimakas sang pumuluyong Pilipino para sa pungsodnon nga kahilwayan kag demokrasya batuk sa imperyalismong US kag lokal nga mga naga-panghimulos nga sahing kumprador kag agalon nga mayduta.

Labing mataas nga pagpasidungog ang ginahatag naton sa aton mga rebolusyonaryong martir kag baganihan para sa ila pinakamataas nga sakripisyo kag tuhay-sa-iban nga pag-alagad sa banwa. Nagasaludo kita sa tanan nga kadre kag katapu sang Partido, mga rebolusyonaryong pwersa kag pumuluyo sa ila pagtinguha kag mga sakripisyo sa rebolusyonaryong paghimakas. Nag-ani kita sang dalagku nga kadalag-an bangud wala kita mag-atras sa pag-atubang sa mabaskog nga hangkat ukon sang mga kasaypanan kag kakulangan. Nagbaskog kita sa pagpangibabaw sa mga peligro kag kabudlayan, sa pagsaway kag pagsaway-sa-kaugalingon kag

pagtadlong sang mga kasaypanan kag kakulangan.

Ululupod naton nga palig-unon ang aton determinasyon nga isulong ang pungsodnon-demokratikong halintang sang rebolusyong Pilipino paagi sang malawigan nga inaway banwa. Determinado kita nga hilubson ang halintang nga ini paagi sang pag-agaw sa gahum pangpulitika sa bug-os nga pungsod agud malab-ot ang halintang sang sosyalismo kag masuguran ang mahaba nga panahon sang transisyon padulong sa komunismo. Sa gilayon, buot naton pagahandaan ang pagsaulog sang ika-40 anibersaryo sang Partido sa maabot nga tuig paagi sang pagpadasig sa tanan-nga-bahin nga pagpasulong sa rebolusyonaryong paghimakas sang



proletaryado kag sang bilog nga pumuluyo sa pagpamuno sang Partido.

Walay untat sa pagsatsat sang mga imperyalista kag mga lokal nga reaksyunaryo nga dapat untatan na sang PKP kag rebolusyonaryong hublag ang pagpasulong sang armadong rebolusyon sa atubang sang pagluib sang mga modernong rebisyunista sa sosyalismo, sang masunod nga pagkabungkag sang mga rebisyunistang rehimen, kag tanan nga opensibang pang-ideolohiya, pangpulitika, pang-ekonomya, pangkultura kag militar sang mga imperyalista sa pagpanguna sang US.

Ginatabunan nila ang kamatuoran nga nagapabilin nga malig-on ang Partido sa panindugan nga Marxista-Leninista kag anti-rebisyunista, nahangpan kag ginaatubang sini ang kongkreto nga malakolonyal kag malapyudal nga kahimtangan agud isulong ang bag-o nga demokratikong rebolusyon, kag ang mga opensiba sang imperyalismo kag mga papet sini nagapalala lamang sa mapiguson kag mapanghimulos nga kahimtangan kag nagadabok sa pumuluyo nga pagsulong sang armadong paghimakas kag iban pa nga porma sang rebolusyonaryong paghimakas.

Nakalimtan sang kaaway ang kamatuoran nga nalutos sang Partido kag sang rebolusyonaryong kahublagan ang tanan nga madinuguon nga kampanya nga pagpangtapna nga ginahimo sang pasista nga rehimeng Marcos kag sang madason nga mga rehimen nga nagapakuno-kuno nga demokratiko.

Lunsay ang pagpahambog sang rehimeng Arroyo, ilabi na sang paltik nga presidente kag mga pangunahon niya nga idu-idu nga militar, nga sarang nila dugmukon ukon estratehiko nga lutuson ang PKP, ang Bag-ong Hangaway sang Banwa kag tanan nga rebolusyonaryong pwersa antes ang 2010. Sa baylo, nagbaskog kag nagsulong ang mga rebolusyonaryong pwersa bangud sa nagapalala nga krisis sang pangkalibutanon nga sistemang kapitalista kag lokal nga nagaharing sistema, kag sa ginakangil-aran nga mga polisiya sang rehimeng Arroyo sang pagluib sa pumuluyo, makasahi nga pagpanghimulos, korapsyon kag terorismo sang estado. Sa tunga sang tanan nga ini, ang nagapadayon nga pagdaku kag pag-uswag sang mga rebolusyonaryong pwersa nahanas sang wala untat nga hilikuton pang-ideolohiya, pangpulitika kag pang-organisasyon sang Partido.

I. Krisis sang imperyalismo kag pagbato sang mga pumuluyo sang kalibutan

Agud malaragway ang subong nga krisis sang pangkalibutanon nga sistemang kapitalista, kinahanglan magsugod sa pagtumod sa pangunahon nga salabton sang US sa krisis nga ini. Ang US amo ang pangunahon nga responsable sa pagduso sa mga polisiya sang globalisasyon nga “neoliberal” kag sang pangkalibutanon nga gerang terorista. Katuyuan sang mga polisiya nga ini nga lubaron ang krisis sang monopolyo kapitalismo, pero sa baylo ginapalala kag ginapadalum sini ang krisis.

Umpisa sadtong katapusan sang dekada 1970, ginpatuman sang US ang polisiya sang globalisasyon nga “neoliberal” para kuno pangibabawan ang problema sang *stagflation* ukon ang dungan nga pagluntad sang istagnasyon kag implasyon kag ang paglala sang isa bunga sang pagtinguha nga lubaron ang pihak sini. Ang problema nga ini ginasiling nga bunga sang daku nga gastos sang guberno sa serbisyo sosyal kag sa mataas nga lebel sang pasweldo. Gani ang deklarado nga huyog sang neolib-

eralismo nga kontrahon ang Keynesian nga pagpasilabot sang estado sa porma sang pagpamuhunan publiko kag pabweluhon ang “libre nga balaligyaan” sang minimal nga pagpasilabot sang Federal Bank paagi sang regulasyon sang interes kag suplay sang kwarta.

Pangunahon nga tum-ok sang neoliberalismo ang paggamit sa estado para pagamayon ang gastos sa serbisyo sosyal kag pasweldo kag tan-ayan ang monopolyong burgesya sang dalagku nga kaltas sa buhis, mga kontrata militar, mga

propyedad publiko, wala kutod nga pagpangutang, garantiya kag subsidyo sa pamuhunan kag hatagan sila sang suporta pangpulitika kag militar sa pagtinguha nila nga mapalapad kag may makuhaan nga hila nga materyales, balaligyaan, mabutangan sang puhunan kag tanan nga tipo sang mga monopolyong bentaha.

Sa idalum sang “neoliberal” nga islogan sang globalisasyon sang “libre nga balaligyaan”, ang mga atrasado nga pungsod ginaduso sang mga imperyalistang pungsod sa pagpanguna sang US nga idenasyunalisa ang tagasa nila nga ekonomya. Sa sini napadasig sang monopolyong burgesya ang konsentrasyon kag sentralisasyon sang kapital sa ila mga kamot paagi sang pagpuga sang supertubo kag bayad-utang, liberalisasyon sang ilig sang kapital kag negosyo, pribatisasyon sang mga propyedad pangpubliko kag serbisyo sosyal, kag deregulasyon nga nagadalasa sa masang anakbalhas, kababai-

han, mga bata kag kapalibutan.

Agud mapanubo ang swelduhan sa taga ka pungsod, ginguba sang US kag iban nga imperyalistang pungsod ang mga kinamatarung sang mga mamumugon kag nagalikaw sila sa mga obligasyon sa mga lokal nga mamumugon paagi sa pagsaylo sang mga pabrika sa iban nga pungsod para sa pagmanupaktura kag malamanupaktura sang mga produkto pangkonsumo kag pagsaylo sa iban nga pungsod ang mga industriya nga magasto sa kapital kag mabaskog magtubo. Pero ang ginpasingki nga pagpanghimulos sa sahing mamumugon kag pigos nga pumuluyo nagapakitid sa pangkalibutanon nga merkado kag nagapalala sa krisis sang sobrang produksyon.

Lugdang na ang tunay nga ekonomya sang kalibutan bunga sang pila ka beses nga krisis sa ekonomya kag pinansya. Sa malawig nga panahon, tuman ka tingkad sini sa kadam-an nga mga pungsod sa kalibutan, kag amo ang nangin pangkabilugan nga dalagan sang mga atrasadong pungsod. Pero pati ang US, ang mga imperyalistang alyado sini kag pila ka pungsod sa ikatlong kalibutan pareho sang China madugay na tani nga naglugdang kundi indi lang sa dalagkuan nga pagpangutang sa sulod kag guwa sang pungsod agud pasikaron ang pag-uswag sang ekonomya anuman ini ka banggian. Ang depresyon nagapanago sa nagapataas nga lebel sang pangkalibutanon nga utang nga pangtapal sa mga depisit sa badyet kag negosyo agud imentenar ang ilig sang negosyo kag pagpangapital pabor sa mga imperyalistang pungsod kag pila ka pungsod sa ikatlong kalibutan, kag magpalutaw sang abstraktong tantos sang pag-uswag nga mas mataas sangsa tunay nga ekonomya.

Ang US ang pinakaabusado sa pagpangutang sa sulod kag guwa

sang pungsod agud abonohan ang depisit sa badyet kag negosyo, magtuga sang ilusyon sang pag-uswag kag ipabilin ang kaugalingon bilang pinakadaku nga merkado sang mga negosyo pangkonsumo sa bilog nga kalibutan. Ang pungsodnon nga utang sang US nagtimbuok halin US\$5.7 trilyon sadtong 2001 padulong sa US\$9.1 trilyon sa subong. Ang madasig nga pagdaku sang depisit sa badyet amo ang bunga sang dalagkuan nga pagkaltas sa buhis, mga kontrata militar-industriyal kag mga gasto sa gera sa Iraq kag Afghanistan.

Nagalab-ot na sa tuigan nga lebel nga US\$800 bilyon ang depisit sa negosyo sang US. Ginpalala pa ini sang paghalog sa pag-angkat sang produkto halin sa mga kaalyado nga kapitalistang pungsod industriyal kag paghingalit sa barato nga patrabaho sa China, India kag Southeast Asia. Wala hawid nga ginagasto sang US ang dolyares sa pag-angkat sang mga produkto pangkonsumo, gani ang US na ang may pinakadaku nga pagkautang sa kalibutan. Sa kaugalingon nila nga lebel, ang mga konsumidor nga Amerikano ginaduso sa dalagkuan nga pagpangutang para sa konsumo sa atubang sang istagnasyon kag pagtibusok sang industriya kag empleyo sa US.

Sadtong panahon sang bukal sang *high-tech* halin 1995 tubtub 2000, nadulaan sang regular nga trabaho ang mga mamumugon nga Amerikano pero bumawi sila sa mga trabaho nga partaym sa nagalapad nga sektor sang serbisyo sang pungsod. Madamu-damu man sa ila ang nangutang para magsulod sa ispekulasyon sa *stock market* kag nagpasugot nga ipagamit sa mga

kumpanya sa pagpamuhunan ang ila mga pondo pangpensyon sa amo nga katuyuan. Makaligad maglupok ang bukal nga *high-tech* sadtong 2001 tubtub 2005, ginduso sang monopolyong burgesya sang US ang bukal sa pabalay paagi sang pagtanyag sang manubo nga interes sa *subprime mortgage* ukon pautang sa pabalay nga gamay ukon halos wala kolateral kag pagtiplang sa mga may balay nga mangutang para sa konsumo base sa ginpahabok nga balor sang ila mga balay nga naka-garantiya sa utang.

Ginbag-o sang mga bangko sang US ang pakete sang mga pautang sa pabalay kag ibaligya ang mga ini sa mga dumuluong nga bangko bilang mga sangkap sang ginatawag *structured investment vehicle*, gani nangin pangkalibutanon ang potensyal nga sakup sang pangpinansya nga krisis bunga sang indi mabayaran nga utang.

Nagakupos ang balaligyaan pangkonsumo sang US bangud sa krisis sang sobrang produksyon, sang krisis pangpinansya bunga sang sobra na nga pungsodnon nga utang sang US, sang pagtibusok sang dolyar, sang pagkatunaw sang pautang nga may kolateral (*mortgage meltdown*) kag sang pagtaas sang presyo sang enerhiya. Ginalau-man nga magaresulta ini sa tuman kalubha nga resesyon sa US kag iban pa nga imperyalistang pungsod sa maabot nga tuig. Ang pagkitid sang balaligyaan pangkonsumo sang US nagabunga sang gulpe nga paggamay sang mga order sa China, India, Southeast Asia kag iban pa nga nagahimo sang mga malamanupaktura nga manubo ang dugangnga-balor para sa mga imperyalis-

Bisan gamay wala nakapadipulos ang mga atrasadong pungsod sa pagnubo sa bili sang dolyar bangud wala naman sila sang signipikante nga alternatibo nga mapangitan-an sang dolyar.

tang pungsod.

Bisan gamay wala nakapadipulos ang mga atrasadong pungsod sa pagnubo sa bili sang dolyar bangud wala naman sila sang signipikante nga alternatibo nga mapangitan-an sang dolyar. Bangud nahigot sa dolyar, labi nga bulnerable sa pagtibusok ang balor sang ila mga kwarta. Ang mga reserba nga dolyar, kon may ara man, inutang man para sa pagbakal sang mga produkto pangkonsumo kag ipangbalanse sa ila *current account*. Madasig man ini nga nagakaubos.

Daku nga kapaslawan ang pagtinguha sang rehimeng Bush nga pasikaron ang ekonomya sang US paagi sa ginpasanyog nga produkyon militar kag pagpangutang. Limitado ang ginapatuhaw nga empleyo sang produksyon militar nga ginakinaiyahan sang malahalon nga mataas nga teknolohiya. Kadungan sini, indi na mabaton sang pumuluyong Amerikano ang daku nga sakripisyo kabaylo sang produksyon panggera kag mga gerang agresyon sa porma sang mga Amerikano nga nagakamatay kag kwarta nga ginagasto sa kumunoy sang Iraq kag Afghanistan. Ang badyet panggera sang US sa duha ka pungsod nagalab-ot na sa masobra \$600 milyon kag ang kabilugan nga nagasto sa Iraq pa lamang nagalab-ot na sa \$1 trilyon, kon pareho nga ilakip sa kwenta ang gastos sa operasyon kag mga kaangot sini.

Nagalapaw na ang dugang pa nga higante nga pagpangutang sang US. Ang nagataas nga lebel sang pungsodnon nga utang, bayad-utang kag depisit sang US sang badyet kag negosyo labi nga nagpasamad sang pangkalibutanon nga kumpyansa sa dolyar kag nagabunga sang pagnubo sang balor sini. Gintantya nga kinahanglan nga taasan sang US ang interes kag buhinan sang indi mag-nubo sa \$2 trilyon ang internasyu-

nal nga pautang agud pungan ang internasyunal nga pagkadula kumpyansa sa dolyar.

Samtang nadugang ang pagpamatuk sang pumuluyong Amerikano sa gerang agresyon sa Iraq kag Afghanistan, padayon naman ang dalagku nga korporasyon sa industriya militar kag langis sa pagpamilit nga padayunon sang US ang gerya kag sa pagmaniobra par amagtukod ang US sang mga permanente nga base militar sa Middle East kag Central Asia.

Ang pagpabilin sang US sa Iraq kag Afghanistan kag pag-usik sini didto sang manggad-tawo kag resorsa materyal may madalum nga negatibong epekto sa US, lunsay sa kaugalingon nga pungsod kag sa luwas sini. Ginapalala sang mga ini ang mga kontradiksyon sa sosyedad sang US kag sa mga kaalyado sini nga imperyalista. Makita sang mga pigos nga pumuluyo kag pungsod ang pagkahitad kag mga kahuyangan sang US kag nagakaengganyo sila nga maghimakas para sa pungsodnon kag kahalwayan sosyal.

Sa US kag iban pa nga imperyalistang pungsod, ginagamit sang monopolyong burgesya ang tanan nga klase sang maniobra nga estratehiko kag taktikal agud ilihis ang atensyon halin sa mga ginaugatan sang pagpanghimulos kag pagpamigos kag agud tapnaon ang sahing mamumugon, mga migrante, pamatan-on kag kababaihan. Nagapanulsol kag nagapalapnag sila sang sobinismo, rasismo kag pasismo agud pahat-pahaton ang sahing mamumugon kag paway-awayon ang pumuluyo sa mga imperyalistang pungsod kag ang pumuluyo sang iban nga pungsod. Ginagamit nila ang masmidya

kag ang nagkalain-lain nga kalin-gawan agud tugahon ang ilusyon sang demokrasya kag ilihis ang atensyon sang publiko sa pinaka-importante nga isyu pangkatilingban.

Pero ang sahing mamumugon kag pumuluyo sa mga imperyalistang pungsod nagabato sa monopolyong burgesya. May lapnagon nga mga welga sang mamumugon, mga rali kag martsa protesta sang mga migrante kag mga militante nga paghulag sa karsada sang pamatan-on sa nagkalain-lain nga pungsod imperyalista. Sa amo man lapta-lapta pa ang mga ini, bisan sa pila ka sitwasyon sa pila ka pungsod mabaskog kag malapnagon ang paglupok sang kaakig sang pumuluyo. Ginapakita sang mga ini ang paborable nga kundisyon para sa padayon nga pag-uswag sang mga pwersang proletaryo kag progresibo. Ginapasa pa sang mga imperyalistang gahum ang bug-at sang krisis pangunahon sa mga pigos nga pumuluyo kag pungsod sa Asia, Africa kag Latin America.

Nagahiliusa pa ang mga imperyalistang gahum sa paghimulos kag pagpamigos sa proletaryado kag mga pumuluyo sang kalibutan, ilabi na sa ikatlong kalibutan.

Nagahiliusa pa ang mga imperyalistang gahum sa paghimulos kag pagpamigos sa proletaryado kag mga pumuluyo sang kalibutan, ilabi na sa ikatlong kalibutan. Bastante sila sa mekanismo agud pasi-

bu-sibuon ang ila mga interes batuk sa komun nila nga mga kaaway. Lakip sa amo nga mekanismo ang IMF, World Bank, ang WTO, ang UN kag Security Council sini, mga pangrehiyon kag bilateral nga kasug-tanan sa negosyo, ang NATO kag iban pa nga pangrehiyon kag bilateral nga tratado kag alyansa militar.

Napabilin sang US ang katuyuan sini bilang nagaisahanon nga *superpower* bangud sa angkon nga

gahum sa pinansya, teknolohiya kag militar nga indi pa malutos sang anuman nga mga alyado sini. Sa pihak sang nagapadayon nga pagluya sang dolyar, nagapabilin ini bilang kwarta sang kalibutan. Pero may pila na nga buslot ang pagginahum sini bangud ang pila ka pungsod nagaprodukto sang langis kag iba pa nga pungsod may daku nga kapot nga dolyar kag ginautangan sang US nagsugod nga magbuhin sang mga transaksyon nga ginagamitan sang dolyar.

Padayon nga nagasingki ang mga kontradiksyon sa tunga sang mga imperyalistang gahum. Nagagutok na ang kalibutan para sa kumpetisyon kag ribalan

bunga sang pagdaku sang numero sang mga imperyalistang gahum kag mga nagahandum mangin imperyalista. Ginahingalitan sang US ang pusisyon sini bilang isahanon nga *superpower* kag nangin tuman kaagresibo kag madabok ini sa pagduso sang ultranasyunal nga mga interes, nga labi pa gid ginalainan sang buot sang mga alyado sini. Kadungan sini, ginahayag sang US ang kaugalingon nga pagkahitad kag mga kahuyangan, nga nagapabaskog sang buot sang iban nga imperyalista nga maghimo sang mga tikang nga kontra sa mga ginahimo sang US.

Sa mga magkaalyado nga imperyalista, ginakahisaan ang US bangud sa dominasyon sini sa pangkalibutanon nga sistemang pangpinansya, mga mayor nga ginakuhaan sini sang langis kag iban pa nga dunang-manggad, mga bulutangan sang puhunan kag mga balaligyaan. Nagapakita sang seryoso nga pagsupak sa US ang France, Germany, Russia kag China

sa mga mayor nga isyu kag pusisyon kaangot sang mga partikular nga rehiyon sa kalibutan. Iban sa US ang tindog nila sa hambalanon sang pagpanalakay kag pagsakop sang US sa Iraq kag Afghanistan kag sa subong nga pagsolo sang US sa benepisyo sa gera.

Magkatuhay ang panindugan sang mga imperyalistang sa isyu sang Palestine, Lebanon, Syria, Iran kag iban pa nga pungsod sa

Middle East. Upod sa mga estado sa mga dulunan sang Central Asia, gintukod sang Russia kag China ang Shanghai Cooperation Organization (SCO) agud balabagan ang pagsulod sang US sa Central Asia.

Magkatuhay ang

pusisyon sang mga imperyalistang pungsod sa sari-saring isyu sa East Asia, South Asia, Africa kag Latin America. Samtang nagadugay nagahitad kag nagakatublag ang relatibong balanse sang gahum sa kubay sang mga imperyalista. Samtang masako ang US sa Iraq, nagapapabakod naman sang pusisyon pang-ekonomya kag pangpulitika ang iban nga imperyalistang gahum sa iban nga bahin sang kalibutan.

Ang pangunahon nga kontradiksyon sa gihapon sa kalibutan amo ang kontradiksyon sa tunga sang mga imperyalistang gahum kag mga pigos nga pumuluyo kag mga pungsod. Pinakamaathag ini nga makita sa wala renda nga pagpanghimulos kag pagpamigos sang mga imperyalista sa bulig sang ila mga papet nga estado kag makita man sa pagbato sang pumuluyo paagi sang rebolusyonaryo nga armadong paghimakas kag iban pa nga porma sang paghimakas.

Ang pinakamangngaranon nga

20% sang populasyon sang kalibutan ang ara sa mga imperyalistang pungsod, kag ang pinakaimol nga 20% ara sa mga pungsod nga ikatlong kalibutan. Ang kita sang pinakamangngaranon 30 ka pilo nga mas daku sangsa kita sang pinakaimol sadtong 1960. Nangin 74 pilo ini nga mas daku sadtong 1995. Subong, ang tuman nga nakapadamu nga pumuluyo nagakabuhi sa kulang sa duha ka dolyar kada adlaw kag konsentrado sila sa ikatlong kalibutan. Sadtong 1973, US\$130 bilyon dolyar lamang. Sadtong 1982, naglukso ini pakadto sa US\$612 bilyon. Sadtong 2006, naglab-ot pa ini sa US\$3.2 trilyon. Imperyalistang pagpamdambong ang nagtulod sang madasig nga pagkalubong sa kaimulon kag pagkautang sang pumuluyo sang Asia, Africa kag Latin America.

Ang armado nga rebolusyonaryong paghimakas, ilabi na sa porma sang malawigan nga inaway banwa, ang pinakamahalon nga armas sa pag-agum sang pungsodnon nga kahilwayan kag demokrasya batuk sa imperyalismo. Ginaatubang sini ang sentral nga hambalanon sang pag-agaw sang gahum pangpulitika kag desaysibo nga paglampuwas sa gahum sang imperyalismo kag pyudalismo. May mga pungsod nga nagahimakas sa armadong rebolusyon pareho sang Colombia, Pilipinas, India, Tamil Eelam kag Turkey. Sa Nepal, gindeklarar sang mga armadong rebolusyonaryo ang pagtapos sang ila inaway banwa. Katuyuan nila subong nga agawon ang gahum paagi sa parlamentaryo nga paghimakas kag popular nga insureksyon. Kon mapaslawan, ginalauman nga liwat sila nga galunsar sang inaway banwa.

Ang anti-imperyalista nga gawi sang pila ka gubyrno amo ang bunga sang pag-insister sang pumuluyo sang pungsodnon nga kahilwayan kag demokrasya. Ginti-

nguhaan sadto sang gubyernong Iraq sa idalum ni Saddam Hussein nga mag-upod sa pila ka imperyalistng gahum batuk sa US tubtub nga nagdesisyon ang US nga maglunsar sang gerang agresyon. Nangahas ang gubyerno sang Venezuela sa idalum ni Hugo Chavez nga hangkaton ang imperyalistang US agud makuha ang suporta sang pumuluyo kag makapatuman sang mga reporma. Padayon nga ginapamilit sang mga gubyerno sang China, Cuba kag People's Democratic Republic of Ko-

rea ang pungsodnon nga kahilwayan kag mga sosyalistang handum sang pumuluyo agud batuan sang imperyalismong US.

Ang krisis nga kahimtangan sang pangkalibutanon nga sistemang kapitalista paborable para sa pagrebolusyon labi na sa Asia, Africa kag Latin America, kon sa diin pinakamatingkad subong ang pangunahon nga kontradiksyon sa kalibutan. Armado nga rebolusyon ang mangin pangunahon nga ilig sa kalibutan bunga sang pagsingki

sang pangunahon nga kontradiksyon kadungan sang pagsingki sang kontradiksyon sa mga imperyalistang pungsod kag sa tunga sang mga imperyalistang gahum. Ang mga krisis indi awtomatiko nga nagakahulugan sang pagsulong ukon pagmadinalag-on sang rebolusyon. Obhetibong kundisyon ang mga ini nga dapat hingalitan sang mga suhetibong rebolusyonaryong pwersa kag pumuluyo agud makapabaskog sila kag malutos ang ila kaaway.

II. Madasig nga nagagaruk nga nagaharing sistema sa idalum sang rehimeng Arroyo

Ara sa permanente nga krisis ang malakolonyal kag malapyudal nga nagaharing sistema sa Pilipinas. Garuk ini sa pinakaubod kag permi nga maluya kag mahuyang bangud ginapabudlayan sang tatlo ka malain nga pwersa sang dumuluong nga monopolyong kapitalismo, lokal nga pyudalismo kag burukrata kapitalismo. Gani bulnerable ini sa krisis sang pangkalibutanon nga sistemang kapitalista.

Sa idalum sang polisiya nga "neoliberal" nga globalisasyon, ang nagaharing sistema tuman nga nagaluya pa gid sangsa nagtaliwan sa patag sang pulitika kag ekonomya. Daku nga katuntuhan ang ginasilang sang rehimeng Arroyo nga ang papet nga republika malig-on ukon ang ekonomya sang Pilipinas padayon nga nagauswag padulong sa kahimtangan sang "first world".

Pwersado ang papet nga estado nga dulaon nga ang tanan nga pakitang-tawo nga pagpatuman sang pungsodnon nga industriyalisasyon kag reporma sa duta. Kontra ini sa paggamit sang resorsa pangpubliko kag pag-engganyo sa mga negosyante nga Pilipino nga magpasakop sa pagpauswag sang pungsodnon nga industriya. Ang reporma sa duta ginahimo sini nga banggian nga mga transaksyon komersyal sa tunga sang mga agalon nga mayduta kag mangunguma

kag direktahan nga mga kumbersyon nga komersyal sang mga duta nga ulumhan kag mga pananum. Ginbaylo sini sa reporma sa duta ang ginatawag nga *stock distribution option* (paagi sang sapi sa korporasyon sa baylo nga titulo sang duta). Ginbag-o sini ang klasipikasyon sang mga duta agud indi masakop sang ginatawag nga Comprehensive Agrarian Reform Program. Mas daku ang ginagasto sa burukratiko nga operasyon sang Department of Agrarian Reform sangsa pagsaylo sang duta sa mga mangunguma nga wala duta.

Ginkuha sang papet nga estado ang mga pungsodnon nga restriksyon sa dumuluong nga pamuhunan. Kadam-an sa mga ini ara sa patag sang serbisyo pangpinansya, negosyo, turismo, malamanupaktura nga nakasentro sa eksport, mga plantasyon kag pagmina. Ginkakas sini ang mga taripa kag

ginapabay-an sini ang mga kumpanya nga multinasyunal nga magtambak sang sobra nga produktong agrikultural kag manupaktura sa pungsod. Nag-us-os sang produksyon agrikultural para sa lokal nga konsumo halin sa abereyds nga 1,509 kilo/tawo/tuig sadtong 1979-81 pakadto sa 1,100 kilo/tawo/tuig sining 2000-02 gani nangin neto nga tagaangkat na lamang sang pagkaon ang pungsod. Napulo ka beses nga nagdaku ang pagsalig sini sa imported nga pagkaon sa tuigan nga bulto halin 1991-95 tubtub 2001-03. Mas madamuan nga ginaeksport ang mga produkto nga agrikultural kag mineral pero sa presyo nga mas manubo ikumparar sadto bangud sa sobra nga suplay sa pangkalibutanon nga merkado. Gamay ang neto nga kita sa pagreeksport sang mga malamanupaktura halin sa industriya sang pag-asebol kag pagpakete bangud kadam-an sang mga sangkap sini imported kag sobra kamahal.

Padayon nga nagadaku ang depisit sa negosyo kada tuig nga nagabereyds sang \$8 bilyon halin 2001 tubtub 2006. Padayon nga nagadaku ang gasto sa importasyon nga ginapaandar sang konsumo. Indi mapuno sang ginakita sa eksport kag remitans sang mga kontraktwal nga mamumugon sa luwas sang pungsod ang gasto sa

pag-import. Ang estado permi nga may higante nga depisit sa badyet nga ginatinguha nga mapahaganhagan sang rehimeng Arroyo paagi sa pagsukot sang mas daku nga buhis sa pumuluyo. Ang daku nga gasto sa pagbayad-utang kag mga aktibidad sang burukrasya kag militar kag iban pa nga kontra-produktibo nga aktibidad nagalapaw na sa ikasarang sang estado nga manukot sang buhis. Naggamay ang ginasukot sa adwana bunga sang liberalisasyon sang negosyo kag kagarukan. Ang pangunahon nga ginatarget sa pagpanukot amo ang masang anakbalhas kag mga nahanunga nga saray sang sosyedad. Nagatibusok ini bangud sa lugdang nga ekonomya nga may mataas nga tantos sang matuod nga kawad-on kag kakulangan sa pangabuhian.

Pero kada tuig, ginatuga ang ilusyon sang pag-uswag sang ekonomya paagi sang pagpanguntang sa sulod kag gwa sang pungsod kag amo man sa pag-engganyo sang dumuluong nga pamuhunan nga *fortfolio* sa merkado sang mga sapi kag bono. Ang nagalubha nga pangkalibutanon nga krisis sa ekonomya kag pinansya nga gintuga sang madasig nga nagadaku nga pungsodnon nga utang sang US, sang *mortgage meltdown* kag wala untat nga gasto militar sang US pat-ud nga maga-ipot sa pangkalibutanon nga pautang para sa Pilipinas kag magabuhin sa mga order para sa hilaw nga materyales kag mga malamanupaktura nga manubo ang dugang-nga-balor bunga sang nagasanyog nga resesyon kag pagkitid sang merkado pangkonsumo sa US. Ang subong nga nalab-ot sang utang sa luwas nga masobra \$64 bilyon kag sang depisit sa negosyo sa luwas nagalauman n ga magatimbuok sa masunod nga tuig, magakahulugan sang malubha nga krisis sa pinansya kag madalum nga pagkatibusok sang balor sang piso.

Madasig nga nagalala ang sosyo-ekonomikong krisis sa idalum sang rehimeng Arroyo. Nagataas ang tantos sang nagapatung-patong nga disempleyo. Ginpabarato sang husto ang kita sang masang anakbalhas nga mamumugon kag mangunguma kag pati sang nahanunga nga saray sang sosyedad. Nagsinaka ang presyo sang mga sandigan nga balaklunon kag serbisyo bunga sang nagadaku nga gasto sa imported nga kagamitan, langis kag iban pa nga sangkap. Nagataas ang presyo sang mga basehang serbisyo pareho sang edukasyon, ikaayong lawas, kuryente, tubig kag salakyan samtang nagarusdak ang imprastruktura pangkatilingban kag nagapangibabaw ang pagkugakum sang tubo. Nahalawhaw ang malapad nga masa sa presyur sang krisis kag sa nagataas nga tantos sang pagpanghimulos. Nagabun-ag ini sang pangkatilingban nga kinagamu.

Ginakaakig sang malapad nga masa sang pumuluyo ang pagpadasig sang mga dumuluong nga monopolyong interes, matag-as nga upisyal sang gubyrerno kag dalagku nga kumprador kag agalon nga mayduta sa tantos sang pagpanghimulos kag pagpandambong sa dunang-manggad sang pungsod. Nagdaku sang 327% ang neto nga kita sang nagapanguna nga 1,000 korporasyon halin 2001 tubtub 2005 kag ang ila tubo nagdaku sang 20% kada tuig.

Malaparan kag madalum ang pagkangil-ad sang pumuluyong Pilipino sa pag-ikog-ikog sang rehimeng Arroyo sa US, Japan kag iban pa nga gahum imperyalista, sa wala renda nga kagarukan sang nagaharing pamilya Arroyo kag mga kroni sini, sa binutig nga pag-

pabugal sang rehimen nga ang Pilipinas nagasaka padulong sa pusion nga *"first world"* samtang labi pa ini nga nagalubha bilang pungsod nga ikatlong kalibutan kag sa mapintas nga tikang sang pulisya kag militar para magtapna sang mga welga sang mamumugon, magpalayas sang mga mangunguma kag pungsodnon nga minorya sa ila mga puluy-an kag ulumhan, ipiton kag dugmukon ang ligal nga kahublagang patriyotiko kag demokratiko, kag bungka-gon ang mga aksyong protesta sang masang anakbalhas kag iban pa nga sektor sang katilingban.

Otsenta porsyento sang pumuluyo ukon mas o menos 65 milyong Pilipino ang nagakabuhi sa katumbas sa piso nga kulang sa \$2 kada adlaw. Nagakabuhi sa malubha nga kaimulon ang masang anakbalhas nga mamumugon kag mangunguma. Ginatunga-tunga sang 80% sang populasyon ang katunga sang pungsodnon nga kita, samtang 20% lamang ang nagapadipulos sa nabilin nga katunga. Ang nagaantos nga masa ang pinakamabaskog nga nagahandum sang rebolusyonaryong pagbag-o. Tuman nga naipit man ang petiburgesyang tagasyudad sa kahimtangan sang katilingban kag ekonomya kag nagakabuyok sila sa rebolusyonaryong prinsipyo.

Ang pinakadaku nga bahin sang kita nga dolyar ginasolo sang nagaharing sistema naghalin sa mga kontraktwal nga mamumugon sa luwas sang pungsod nga subong nagapadala sa Pilipinas sang kabilugan nga \$15 bilyon kada tuig. Pero lubos sila nga nasub-an sa kmatuoran nga bangud sa malubha nga pagpanghimulos kag pagkaatrasado sang ila pungsod napilitan

**Otsenta porsyento
sang pumuluyo ukon
mas o menos 65
milyong Pilipino ang
nagakabuhi sa
katumbas sa piso
nga kulang sa \$2
kada adlaw.**

sila nga magpangita sang trabaho sa luwas sang pungsod nga manubo ang pasweldo kag nagadingot sang mga kinamatarung nga ginabaton sang mga mamumugon sang pungsod nga ila ginatrabahuan. Ginakaakig nila ang kahimtangan nga dapat pa nila bayaan ang ila mga pamilya kag ginasukot sila sang reaksyunaryong gubyrerno pero wala naman sila ginahatagan sang proteksyon kag suporta sa iban nga pungsod.

Ang sosyo-ekonomiko nga krisis nagagatong sa pangpulitika nga krisis sang nangaharing sistema. Nagkitid ang espasyo para sa paghatagay sang magbanggi nga reaksyunaryo kag labi nga nagalaway si Arroyo nga solohon ang mga makurakot sa gubyrerno. Mas madali nga nabuyagyag sa banwa ang wala renda nga kagarukan sang rehimen. Gilayon nga ginakundenar sang mga progresibong pwersa kag reaksyunaryo nga oposisyon ang rehimen. Pati sa sulod sang rehimen, nagadaku ang bangga sang mga interes sa negosyo kag pulitika sa tunga sang pinakasuod nga himata kag kroni sang paltik nga presidente sa isa ka bahin, kag pila ka alyado niya sa nagaharing koalisyon sang KAMPI, Lakas-NUCD kag Nationalist People's Coalition sa pihak nga bahin.

Wala tupong sa nagtaliwan ang pagkapaksiyun-paksiyon sang reaksyunaryong hangaway. Mayorya sang mga upisyal kag suldado akig sa rehimen Arroyo kag sa mga upisyal nga maki-Arroyo sa pinakapunta sang *chain of command*. Kumpyansado ang mga upisyal nga kontra-Arroyo nga mayorya sang mga upisyal handa nga mag-atras sang suporta sa rehimen kag magkambyo sang suporta sa isa ka konseho sang mga sibilyan nga lider sa tion nga mabilog ang isa ka higante nga hulag sang mnasa batuk sa rehimen.

Bisan nga dalayawon ang pag-

kundenar nila sa mga krimen sang rehimen Arroyo, ang pag-agaw nanday Trillanes sa Manila Peninsula Hotel sadtong Nobyembre 29 wala nagkunsiderar sa singgit sang banwa para sa pagbag-o sandig sa prinsipyo sang pinakamataas nga pusisyon sang sibilyan kag sa kakinahanglanon sang serye sang mobilisasyong masa kag pag-atras sang suporta militar sa rehimen.

Ang rehimen Arroyo preparado nga magpabaha sang dugo makabilin lamang sa poder. Gani ang malapad nga kubay sang mga pwersang oposisyon nagakadapat nga maglunsar sang mga mobilisasyong masa nga makapugong sa paggamit sang rehimen sang armadong kusog, pareho sang pukanon sanday Marcos kag Estrada sadtong 1986 kag 2001. Kinahanglan man nga maghimo sang pamaagi ang mga kontra-Arroyo nga upisyal sang militar kag pulisya kon paano paralisahon ang maki-Arroyo nga *chain of command* kag habigon ang mga ordinaryong suldado. Lakip sa mga problema nga ginaatubang sang tanan nga pwersang anti-Arroyo ang pag-atras-abante sang mga reaksyunaryo nga pwersang anti-Arroyo kag ang lambat kontrapaniktik sa sulod sang reaksyunaryong hangaway.

Pero kon sa pihak sang pagkangil-ad sang pumuluyo makapabilin pa gihapon sa poder ang rehimen Arroyo tubtub 2010 bangud indi pa ini sarang pukanon sang malapad nga ligal nga nagahiliugyong prente, indi pagbatunon sang malapad nga masa sang pumuluyo ang posibilidad nga mag-antos sa idalum sang mga rehimen nga mag-abulos-bulos paagi sang eleksyon kag labi pa gid sila magasalig sa inaway banwa para bag-uhon ang bilog nga nagaha-ring sistema. Makapadipulos kon amo ang armadong rebolusyonaryong kahublagan sa pagkapaslaw sang ligal nga nagahiliug-yong prente nga map-

atalsik ang rehimen Arroyo.

Samtang nagatuluhaw ang nagkalain-lain nga huyog nga anti-Arroyo sa sulod sang reaksyunaryong hangaway sa kabangdanan nga patriyotiko, nagapatuyang naman ang mga maki-Arroyo nga upisyal sa nagkalain-lain nga lebel sa pagpangawat sa pondo sang estado, pagpangupit sa mga basehang suplay sang mga tropa kag pag-entra ukon pakighumbananay sa mga sindikato kriminal sa iligal nga pagtroso, ismagling, pasugal, pagbaligya sang iligal nga droga, prostitusyon, bayaran nga manugpatay, pagpamuyong kag *kidnap for ransom*. Sa kabilugan kag sa esensya, ang reaksyunaryong hangaway isa ka mersenaryo kag garuk nga establisyemento nga naakadapat waskon sang armadong rebolusyon.

Ginpanghalit sang rehimen Arroyo ang Oplan Bantay Laya (OBL) halin 2002 tubtub katapusan sang 2006 kag ang OBL 2 halin sang magsulod ang 2007, kag nagsabwag ini sang lapnagon kag sistematiko nga mga paglapas sa tawhanong-kinamatarung agud magsunod sa pangkalibutanon nga gera terorista sang US kag magbaton sang ayuda militar kag pangekonomya sang US, masiguro ang katampad sang mga upisyal kag suldado sang pwersang militar kag pulis, kugmaton kag tapnaon lunsay ang mga rebolusyonaryong pwersa kag ang ligal nga oposisyon kag pat-uron ang pagpabilin sang rehimen sa pulitika.

May duha ka sanga ang OBL. Ang isa ka sanga ginalakipan sang mga militar nga kampanya sang pagtapna paagi sang pagkonsentrar sang mga pwersa sa pila ka prenteng gerilya kag paghimo sang mga kahayupan agud sakiton kag sa sini pahadlukan ang pumuluyo kag palayason sila sa duta para hatagan-dalan ang mga plantasyon kag mga kumpanya sang pagmina. Ang isa pa ka sanga ang paghimo

sang mga ekstrahudisyal nga pagpatay, pagkuot kag pagtortur sa mga di armado nga aktibista nga ligal lakip ang mga lider mamumugon, mangunguma, imol nga tagasyudad, pamatan-on, kababaihan, mamahayag, tawong simbahan, abugado kag tagapangapin sang tawhanon kinamatarung.

Nahamulag na ang rehimeng Arroyo sa Pilipinas kag sa iban nga pungsod bangud sa mga kahayupan nga ginahimo sang mga pwersang militar kag pulis batuk sa ginatus-gatos kalibo nga pumuluyo sa kaumhan kag ekstrahudisyal nga pagpatay kag pagkuot sa masobra sanglibo nga di armado nga progresibo nga aktibistang ligal. Pero ginapamilit gihapon sang rehimen nga madugmok kuno sini ang armado nga rebolusyonaryong kahublagan paagi sa pagtanyag sang ginatawag nga amnestiya kag pondo sa rehabilitasyon kadungan sang madinuguon nga kampanya sang armadong pagtapna. Nahibal-an na sang pumuluyo nga ang mga upisyal sang reaksyunaryong hangaway naga-imbento sang mga listahan sang kuno mga nagsurender kag ginabulsa nila ang kwarta.

Ang sosyo-ekonomiko kag pangpulitika nga krisis kag ang pag-ikog-ikog, kagarukan, kabutigan kag kapintas sang rehimeng Arroyo ang nagapaakig lamang sa pumuluyo kag nagasulsol sa ilang batuan ang rehimen kag maghimo sang nagkalain-lain nga porma sang pagpamatuk. Nahayag na sa bug-os nga kalibutan ang mga krimen sang rehimen kag nagapahayag na ang mga pinakarespetado nga institusyon, partido, organisasyong masa kag personahe sang internasyunal nga paghiliusa sa pumuluyong Pilipino sa ila paghimakas para sa pungsodnon nga kahilwayan, demokrasya, kinamatarung sosyal kag kalinungan.

Sobra na ang pagkahamulag sang rehimeng Arroyo. Luto na ini

para patalsikon sang malapad nga masa sang pumuluyo kag sang malapad nga nagahiliugyong prente sang mga pwersang anti-Arroyo. Pinakadesidido sa pagpatalsik kay Arroyo ang mga patriyotiko kag progresibong pwersa sang masang anakbalhas kag nahunga nga saray sang katilingban bangud sila ang pangunahon nga nagaantos sang kabudlayan sa pangabuhian, ekstrahudisyal nga pagpatay, pagkuot kag tortur sa bilangguan. Pero naga-atras-abante ang mga reaksyunaryong partido anti-Arroyo bangud pila sa ila mga lider nagaumpisa sang paghanda para sa eleksyon 2010. Magamadinalag-on man ukon indi ang ligal nga kahublagang masa sa pagpatalsik sa rehimeng Arroyo, nakatipon sang kusog kag eksperyensya ang mga ligal nga demokratikong pwersa sa paghulag para patalsikon ang rehimen.

Nagabaskog kag nagasulong ang armado nga rebolusyonaryong kahublagan sang pumuluyong Pilipino paagi sang mga taktikal nga opensiba kag hilikuton pangmasa. Ini ang makapadipulos sa padayon nga kapaslawan sang malapad nga nagahiliugyong prente nga patalsikon ang rehimeng Arroyo bangud sa maathag nga pagatras-abante sang mga reaksyunaryong pwersa anti-Arroyo. Labi na gid ini nga nakilala bilang pangunahon nga paagi para bag-uhon ang bilog nga nagaharing sistema. Kadungan man, padayon sini nga ginabuyok ang mga progresibong pwersa sang ligal nga demokratikong kahublagan nga maghimud-os sa paghimakas. ginabuyok sini ang mga aktibistang masa nga magpasakop sa inaway banwa. Labaw sa tanan, nakatipon ini sang kinahanglanon nga armadong kusog para pukanon ang bilog nga nagaharing sistema sa katapusan nga bahin.

Nagahimud-os ang Bangsamoro sa paghimakas para sa pagdesis-

yon-sa-kaugalingon batuk sa guberno sang Maynila. Dugay-dugay mabalitaan nga magasulod na sa “pinal nga kasugtanang pangkalinungan” ang guberno kag ang ang Moro Islamic Liberation Front (MILF). Pero permi nga maabtik nga ginapabutyag sang mga lider sang MILF nga nagapabilin sila nga mabinantayon sa katusuhan kag pagpaniplang sang guberno sang Maynila. Maathag nila nga ginahambal nga indi sila magsunod sa dalan sang pagsurender nga gin-sunod sang iban nga yabing lider sang Moro National Liberation Front (MNLF).

Padayon nga nagapanindugan ang aton Partido sa pagkilala kag pagsuporta sa kinamatarung sang pumuluyong Moro sa pungsodnon nga pagdesisyon sa kaugalingon kag lubos nga kontrol sa ila duta sang ila katigulangan. Ginamente-nar naton ang alyansa sa mga rebolusyonaryong pwersa sang pumuluyong Moro kag ginabuyok naton sila nga magbantay batuk sa mga maniobra sang US kag iban pa nga gahum imperyalista para maglatag sang mga balwarte pangpulitika, pang-ekonomya kag militar sa Mindanao kahimbon ang mapiguson nga guberno sang Maynila.

Madulom subong ang posibilidad nga magapadayon ang pormal nga sugilanon sang guberno sang Maynila kag National Democratic Front of the Philippines (NDFP). Pangunahon nga kabangdanan diri ang responsibilidad sang rehimeng Arroyo sa 12 ka sablag sa sugilanon nga ginhilera sang NDFP kag ang indi sini pagpakita sang intensyon nga kuhaon ang nasambit nga mga sablag.

Ginaliwat-liwat sang rehimen ang linya nga dapat magsurender ang NDFP sa ngalan sang wala limite nga untat-linupok nga nagapahigad sa mga reporma sosyal, pang-ekonomya kag pangpulitika

nga ginainsister sang pumuluyo, kag nagapabwelo sa mga “lokalisado nga sugilanon pangkalinungan” nga nagatuyo pahat-pahaton ang rebolusyonaryong kahublagan kag sa paltik nga tanyag nga amnestiya kag pondo sa rehabilitasyon nga nagatuyo nga suhulan ang mga nagsurender kag sa ulihi patyon sila.

Nagalaum ang rehimeng Arroyo nga madugmok ukon labi sini nga mapaluya ang armado nga rebo-

lusyonaryong kahublagan sa nabilin nga mga tuig tubtub 2010. Baliskad diri, ang armado nga rebolusyonaryong kahublagan du-gang nga magabaskog kag mabutang sa pusisyon para magahatag sang mga pamatay nga bunal sa inutil nga rehimen sa tunga sang tum-an kalubha nga krisis sang naga-haring sistema.

Ara sa pumuluyong Pilipino ang tanan nga rason para isulong ang bag-o nga demokratikong rebolu-

syon paagi sang malawigan nga in-away banwa. Ginapaantos sila sa ginpabaskog nga pagpamigos kag pagpanghimulos. Obligas-yon sila nga magbato para sa ila mga pang-sodnon kag demokratikong kina-matarung kag interes. Mahingalitan nila ang krisis nga kahimtangan sang nagaaring sistema para mag-pundar sang rebolusyonaryong kusog kag magsulong sang hulu-halintang sa rebolusyonaryong paghimakas.

III. Nagpadayon nga pagsulong sang mga rebolusyonaryong pwersa kag kahublagang masa

Padayon nga ginadamgo sang mga imperyalista kag mga reaksyunaryong Pilipino ang pagkabungkag sang PKP bunga sang lubos kag hayagan nga pagpanumbalik sang kapitalismo sang mga rehimen nga ginaharian sang mga rebisyunista. Wala nila ginalantaw ang kamatuoran nga gintukod ang Partido sang 1968 para mismo itib-ong ang Marxismo-Leninismo-Kaisipang Mao Zedong, sikwayon ang suhetibismo kag oportunismo sang Communist Party of the Philippine Islands (1930) kag sang gintingub nga Partido Komunista kag Sosyalista (1938).

Nakatipon kita sang rebolusyonaryong kusog kag manggaranon nga eksperensya sa kabuhi-kag-kamatayon nga paghimakas sa napulo’g apat ka tuig nga pasistang diktaduryang Marcos kag sa masunod nga mga rehimen nga nagapakuno-kuno nga demokratiko pero nangin mapintas sa tuyo nga tapnaon ang demokratikong rebolusyon sang banwa. Bugtaw nga nagadamgo ang rehimeng Arroyo sa pagpamahug sini nga dugmukon ukon estratehiko nga paluyahon ang Partido kag rebolusyonaryong kahublagan antes mag-abot ang 2010. Ginahingalitan sang Partido ang nagapalala nga krisis sang nagaharing sistema, ang tanan-nga-bahin nga pagkabangkarote sang rehimeng Arroyo, kag ang natipon nga rebolusyonaryong kusog kag inagihan sang pumuluyo kag tanan nga rebolusyunaryong pwersa.

Nagasunod ang Partido sa Marxista-Leninista-Maoista nga linya sa pilosopiya, ekonomya pangpulitika, syensa pangkatilingban, estratehiya kag taktika sang pagpasulong sang pungsodnon-demokratikong rebolusyon, pagpundar sang sosyalismo kag pagpadayon sang rebolusyon sa idalum sang proletaryong diktadurya. Nahangpan paagi sa linya nga ini ang mga

layi sang paghulag sang naturalisa kag katilingban kag ang nagligad, subong kag maabot nga mga halintang sang pag-uswag sang katilingban.

Tanan nga katapu sang Partido dapat magkuha sang edukasyon sa mga sandigan nga prinsipyo sang Marxismo-Leninismo-Maoismo kag sa kongkreto nga pagsapraktika sang mga ini sa kasaysayan kag subong nga kahimtangan sang Pilipinas kag sang pumuluyong Pilipino. May tatlo ka lebel sang edukasyon pangPartido para sa tanan nga katapu. Ini ang basehan, intermedya kag abante nga kurso.

Kada katapu dapat mag-agi sa Basehang Kurso sang Partido (BKP). Nagaunod ini sang pagtuon sa kasaysayan sang Pilipinas, mga basehang problema sang pumuluyong Pilipino kag sang demokratiko kag istoriko, ekonomya pangpulitika sang kapitalismo kag sosyalismo kag rebolusyonaryong estratehiya kag taktika. Ang BKP naghatag sa kada katapu sang Partido sang pundasyon para magpabilin nga malig-on sa rebolusyonaryong banas kag para mapauswag sang kamuklatan kag ikasarang magrebolusyon.

Ang intermedyang kurso nagaunod sang paganalisa sa mga pangkabilugan kag partikular nga inagihan sa rebolusyong Pilipino nga ginakumparar sa mga rebolusyonaryong inagihan sa iban nga pungsod sa pag-ubay sang mga ginatudlo ni Kaupod Mao Zedong. Ginaengganyo ang mga katapu sang Partido nga tunan kag sumahon ang inagihan sang ila mga yunit kag organo, tumuron ang mga mayor nga kasaypanan kag kahuyangan sa pila ka panahon kag magpanugyan sang mga tikang sa pagtadlong.

Ang abante nga kurso nagaunod sang pagbasa kag pagtuon sa mga sinulatan nanday Marx, Engels, Lenin, Stalin kag Mao bahin sa materyalismong diyalektiko

kag istoriko, ekonomya pangpulitika sang kapitalismo kag imperyalismo, sosyalistang rebolusyon kag konstruksyon, kasaysayan sang internasyunal nga kahublagang komunista, estratehiya kag taktika kag teorya sang nagapada-yon nga rebolusyon sa idalum sang proletaryong diktadurya.

Sa kada halintang sang edukasyong teoritiko kag pangpulitika, nagaalam ang mga kadre kag katapu sang Partido kon paano isapraktika ang teorya sang Marxismo-Leninismo-Maoismo sa kongkretong kahimtangan. Ginapatalum nila ang paghakos kag pagsapraktika sang imperyalistang diyalektika sa pagpauswag sang ila proletaryo nga rebolusyonaryong

panindugan, panan-awan kag pamaagi. Ini ang esensya sang pagtukod sang Partido sa ideolohiya.

Aang mga kadre kag katapu sang Partido nangin maligon sa mga rebolusyonaryong prinsipyo, pleksible sa polisiya kag epektibo sa trabaho bangud sa ubay sang Marxismo-Leninismo-Maoismo kag sa muklat nga pagsapraktika sini sa kongkretong kahimtangan sang rebolusyong Pilipino. Ang Marxismo-Leninismo-Maoismo indi lutaw sa kamatuoran, kundi nagapalanupsop ini kag nagahayag sa mga layi sang paghulag sini paagi sang pagsapraktika sang materyalistang diyalektika.

Indi madugmok kag padayon nga nagadaku ang Partido bangud nagapadamu nga katapu ang ginarekrut kag nagaagi sa edukasyong teoritiko kag pangpulitika. Ang nagabaton sang amo nga edukasyon naarmasan sang ikasarang nga maganalisa nga magapalig-on sa ila moral nga panindugan para sa

makatarungan nga handum sang sosyal nga rebolusyon.

Kumprehensibo kag madaluman nga nakapadipulos ang mga kadre kag katapu sang Partido sa Una kag Ikaduha nga Dungganon nga Kahublagang Panadlong. Lubos nila nga nahangpan kon paano ginluiban sang modernong rebisyunista ang sosyalismo, kag kon paano gingamit sang mga imperyalista ang mga petiburges nga tendensyang pangideolohiya para maglunsar sang anti-komunista nga opensiba sa ideolohiya kag ilikaw ang masang anakbalhas bahin sa kinaiya kag mga bunga sang monopolyo kapitalismo. Ginsikway nila ang panan-awan sang mga suhetibista nga indi

na kuno malakolonyal kag malapyudal ang Pilipinas.

Ang Partido indi simple nga nagahulag base sa kon ano nga lutaw nga dogmatiko nga kinaalam ukon sang tukod-tukod nga ideya sa nga ginaatubang sang sosyalismo ukon komunismo.

Nagtuon kag nag-

analisa kag nagahulag ini sa kongkreto nga malakolonyal kag malapyudal nga kahimtangan nga mapanghimulos kag mapiguson sa pumuluyo. Sandig diri, ginapatumang sini ang pangkabilugang linya pangpulitika sang demokratikong rebolusyon sang banwa sa pagpamuno sang sahing mamumugon agud batuan kag lutuson ang pagginahum nga imperyalista kag pyudal. Wala ini sang ginalaktawan nga halintang sa rebolusyong Pilipino. Nagatinguha ini padag-on ang halintang sang bag-o nga demokratikong rebolusyon paagi sang malawigan nga inaway banwa antes sini malab-ot ang halintang sang sosyalistang rebolusyon.

Sa pagtukod sang Partido sa

pulitika, mapisan nga nagahimakas ang mga kadre kag katapu sa pangkabilugang linya sang demokratikong rebolusyon sang banwa, kag kaangot sini ginagamit nila ang rebolusyonaryo nga armadong paghimakas kag ang pagpakighiliugyong prente bilang duha nga makagagahum nga armas para pukawon, organisahon kag pahulagon ang malapad nga masa sang pumuluyo batuk sa mga imperyalista kag mga lokal nga nagapanghimulos nga sahing kumprador kag agalon nga mayduta.

Lunsay sa ligal nga demokratikong kahublagan kag sa armadong kahublagang masa, ang Partido nagapamuno subong sa minilyon nga pumuluyo kag nagahulag sa tanan nga rehiyon sang pungsod, sa masobra 70 sa 81 prubinsya kag masobra 800 syudad kag munisipalidad. Ang BHB nagahulag sa 120 tuhtub 130 prenteng gerilya sa absoluto nga pagpamuno sang Partido. Ang pagbag-o-bag-o sang numero sang mga prenteng gerilya mahimo nga bunga sang konsolidasyon kag reorganisasyon nga ginahimo sang Partido kag hangaway sang banwa ukon sang temporaryo nga pagadyas sa atubang sang konsentrado nga atake sang mga pwersang kaaway.

Ang reaksyunaryong hangaway nakakonsentrar lamang sa indi magsobra sa 10% sang mga prenteng gerilya kag sa indi magsobra sa 300 tuhtub 600 sa masobra 18,000 baryo sa mga prenteng gerilya sa anuman nga takda nga panahon. Nagamuhan sila sa pleksible nga taktika sang konsentrasyon, dispersal kag pagsaylu-saylo nga ginagamit sang BHB. Ginakapoy sila sa kaugalingon nga OBL nga nagaluntad halin sa sadtong 2002 kag nagakademoralisa na sila.

Nagasunod ang Partido sa estratehikong linya sang inaway banwa paagi sang pagpalibot sa kasyudaran halin sa kaumhan sa sulod

sang malawig nga panahon para magtipon sang armadong kusog paagi sa mga taktikal nga opensiba sa halintang sang estratehikong depensiba kag estratehikong pagkapatas, tubtub nga masarangang na nga agawon ang kasyudaran sa isa ka pungsodnon nga estratehikong depensiba. Paagi sa inaway banwa, ginapauswag sang Partido ang sandigan nga alyansa sang sahing mamumugon kag mangunguma.

Gintingub sang Partido ang armadong paghimakas, rebolusyong agraryo kag pagtukod sang base. Nagalunsad ang BHB sang mga taktikal nga opensiba sa panahon sang estratehikong depensiba agud magpapas sang mga yunit sang kaaway kag kumpiskahon ang ila mga armas. Gani nagasulong ini halin sa gamay pakadto sa daku kag halin sa maluya tubtub mabaskog. Ginapatuman sini ang minimum nga programa sang reporma sa duta kag hulu-halintang nga nagapakadto sa maksimum nga programa sang pagpanagtag sang duta sa mga nagatalauma agud tumanon ang rebolusyong agraryo. Gani nagapasakop sa armadong rebolusyon ang masang mangunguma.

Nagatukod sang base ang Partido paagi sang pagtukod sang mga organisasyong masa kag mga organo sang gahum pangpulitika kag amo man sang isa ka sistema sang depensa nga ginapasakupan sang mga pultaym nga yunit sang BHB, mga milisya kag mga yunit pangdepensa. Gani ang mga atrasadong baryo nahimo nga mga balwarte pangpulitika, pang-ekonomya, militar kag pangkultura sang rebbolusyon kag magauswag halin mga prenteng gerilya pakadto sa malig-on nga baseng purok.

Ang isa ka prenteng gerilya ginabug-os sang mga baseng gerilya kag pila ka sonang gerilya. Ang seguridad sang baseng gerilya ginamligan sang relatibo tipon nga

platun gerilya sang hedkwarters, duha pa nga platun ang nagaamlig naman sa mga sonang gerilya. Nakalapta sila sa mas malapad nga sakop sangsa platun sang hedkwarters nga nagaserbi nga sentrode-grabidad para sa bilog nga prenteng gerilya. Mahimo sila nga tunga-tungaon sa mga iskwad kag tim para sa mas malapad nga dispersal. Ang isa ka kinaandan nga prenteng gerilya may kabug-usan nga kusog nga isa ka kumpanya.

Ang isa ka prenteng gerilya may ikasarang maglunsar sang mga taktikal nga opensiba sa lebel sang tim, iskwad kag platun. Ginakaptan sang pangprubinsya kag pangrehiyon nga kumand sa operasyon sang BHB ang inisyatiba kag nagapauswag sila sang ikasarang magtipon sang mga pinadaku nga platun ukon mga kumpanya agud maglunsar sang mga taktikal nga opensiba kag iban pa nga konsentradong operasyon sang BHB. Ang nagadamu nga kadalag-an sang mga platun, pinadaku nga platun kag kumpanya sang BHB nagahawan sang dalan para sa pagtuhaw sang malig-on nga baseng purok, paglubos sa estratehikong depensiba kag pagsulong pakadto sa estratehikong pagkapatas.

Ang minimum nga programa sang reporma sa duta ginalakipan sang pagpanubo sang arkila sa duta, pagpanubo sang interes sa pantang, pagpaayo sang presyo sang mga produkto sang mangunguma kag pagpadaku sang pang-agrikultura kag iban pa nga produksyon paagi sang magpamilya ukon paryente nga pang-umpisa nga porma sang kooperasyon. Nagapadayon ang minimum nga programa bangnugud sa limitado nga kusog sang

prenteng gerilya, ila-bi na kon may malapit nga konsentrasyon sang kusog sang kaaway.

Pero ang konsolidasyon kag pagpalapad sang mga prenteng gerilya ukon ang pagtingub sang mga prenteng gerilya pakadto sa malig-on nga baseng purok nagapadaku sang posibilidad nga mapatuman sang mga rebolusyonaryong pwersa ang maksimum nga programa nga pagkumpiska sang duta sa mga agalon nga mayduta kag libre nga pagpanagtag sang mga ini sa mga mangunguma nga wala sang duta.

Ang pagtuukod sang base ginasakupan sang pagtukod sang Pula nga gahum pangpulitika paagi sang pagtukod sang mga organisasyong masa kag mga organo sang gahum pangpultika kag pagpundar sang armadong kusog. Matigayon ini kon lubos na nga nabungkag sang mga rebolusyonaryong pwersa ang organo sang gahum pangpulitika sang kaaway, napalayas ang daku nga mapanghimulos kag kontra-rebolusyonaryo kag nadugmok ang mga nagasulod nga pwersa sang kaaway. Sa amo man, kon ang kaaway labi nga mas mabaskog, ginagamit sang BHB ang taktika sang paglikaw kag pagpanilag agud tukibon ang mga kahuyangan sang kaaway, sa katuyuan nga atakehon ang mahina nga bahin nila.

Ginagamit sang Partido ang polisiya kag mga taktika sang nagahiliugyong prente agud pasanyugon ang kusog sang mga rebolusyonaryong pwersa kag dugangan pa ini paagi sang pagpalapad sa nagahiliugyong prente.

Ang istruktura sang nagahiliugyong prente sang mga rebolusyonaryong pwersa ginalakipan sang sandigan nga alyansa sang mamu-

**Amo sini ang
kadalag-an sang
malapad nga ligal
nga nagahiliugyong
prente gani ang pila
ka tawo nadala sang
pagsigahum ini na
ang dalan para
makuha sang masa
ang gahum.**

mugon kag mangunguma, progresibong alyansa sang masang anakbalhas kag petiburgesyang urban, kag sang patriyotiko nga alyansa sang mga progresibo nga pwersa kag nahanungang burgesya.

Ang malapad nga nagahiliugyong prente ginalakipan sang temporaryo nga pagpakig-alyansa sa mahuyang kag indi masaligan nga alyado nga masami halin sa mga seksyon sang mga mapanghimulos nga sahi batuk sa pinakamalaut nga pwersa sang reaksyunaryo nga pinaka-idu-ido sa mga imperyalista. Ang Partido mahimo magpakigbahin sa isa ka malapad nga pagpakighiliugyong prente sa pila ka reaksyunaryo agud ihamulag sang lubos kag dugmukon ang pinakamalaut nga pwersang reaksyunaryo sa pinakamalip-ot nga panahon nga masarangan. Ang Partido kag rebolusyonaryong kahublagan ang labi nga makabenepisyong sa malapad nga nagahiliugyong prente sang mga rebolusyonaryong pwersa sa umpisa pa lamang.

Sa pagpakighiliugyon nga prente sa mga reaksyunaryong pwersa, mangin mabinantayon ang Partido sa anuman nga tendensya sang Tuo nga oportunismo kag batuk sa pagtraidor sang reaksyunaryong kaalyado. Maghalong man ang Partido sa peligro sang "Wala" nga oportunismo paagi sang pagpangindi sa temporaryo nga pagpakig-alyansa sa di estable kag indi masaligan nga alyado nga makabulig para labi nga malab-ot ang malapad nga masa sang pumuluyo kag ang pila ka resorsa kag pasilidad nga pwede naton magamit.

Ang nagahiliugyong prente isa ka malahalang kag indi mabalibaran nga hinganiban para habigon ang mas madamu nga pumuluyo sa ligal nga kahublagan kag sa rebolusyonaryo nga armadong paghimakas. Mangin amo kaepektibo ang ligal nga nagahiliugyong prente

gani mapadaku sang progresibong pwersa ang ila ligal nga partido kag organisasyong masa, magangkon sang mabaskog nga impluwensya pangpulitika sa sulod sang reaksyunaryo nga nagaharing sistema, magadaug sila sa mga eleksyon kag makapasakup sa matawhay nga pagpatalsik sa pinakamalaut nga reaksyunaryo sa poder. Amo sini ang kadalag-an sang malapad nga ligal nga nagahiliugyong prente gani ang pila ka tawo nadala sang pagsigahum ini na ang dalan para makuha sang masa ang gahum. Ang pinakamahalahalang sa Partido amo nga mapauswag ang nagahiliugyon nga prente para sa armadong paghimakas kag indi lamang para sa ligal nga paghimakas.

Ang rebolusyonaryong polisiya kag mga taktika sa pagpakighiliugyon nga prente direkta kag indirekta nga nagaserbi sa armadong paghimakas. Madali hangpon kon paano ginpauswag sang mga rebolusyonaryong pwersa ang nagahiliugyon nga prente para sa armadong paghimakas. Nakaangot ini sa pangkabilugan nga linya sang demokratikong rebolusyon sang banwa paagi sa inaway banwa. Kinahanglan ipaathag nga pati ang mga reaksyunaryo nakabulig sa pagtukod sang nagahiliugyong prente para sa armadong paghimakas kon nagasunod sila sa mga layi sang gubyrno sang pumuluyo, nagabayad sang nagakaigo nga rebolusyonaryong buhis, nagaamot sang mga resorsa lakip ang mga armas, nakipagbuligay sa armado nga rebolusyonaryong kahublagan, kag nagasuporta sa mga proyekto sosyo-ekonomiko kag sa mga paghimakas para sa mga kinamatarung kag reporma nga may benepisyong para sa pumuluyo.

Sa pagpasulong sang ligal nga pagpakighiliugyon nga prente, wala ginapamatukan sang Partido, kundi ginabuyok pa gani sini, ang

paghimo sang mga patriyotiko kag progresibo nga pwersa sang mga ligal nga aktibidad, lakip ang mga napanahon nga protestang masa kag paghimakas elektoral. Aprubado mismo sang Partido ang sugilanon pangkalinungan sa tunga sang Gubyrno sang Republika sang Pilipinas (GRP) kag NDFP.

Ang nasambit nga pagpagsugilanon nagakahulugan sang pagpakig-alyansa kag pagtinguha nga may untat-linupok agud hatagan-dalan ang mga reporma pangkatilingan, pang-ekonomya kag pangpulitika. Paagi sa nasambit nga pagpakignegosasyon, matumod sang Partido kon ang mga nagaharing reaksyunaryo bala ukon ang mga reaksyunaryo nga ara sa oposisyon ang mas maayo nga makaaalyado para makapatuman sang pila ka kinahanglanong nga basehang reporma nga makaengganyong sa kahublagang masa para sa pungsodnon kag kahilwayan sosyal.

Ang prinsipyado nga pusisyon kag kondukta sang NDFP sa sugilanon pangkalinungan nagaserbi para sa mapalapnag ang programa sang demokratikong rebolusyon sang banwa kag mapataas ang pungsodnon kag internasyunal nga pusisyon kag prestihiyong sang mga rebolusyonaryong pwersa. May kangtanan man ukon wala sa sugilanon pangkalinungan, nakahimo gihapon ang NDFP sang epektibong nga hilikuton proto-diplomatiko kag diplomatiko, amo man sang hilikuton sa internasyunal nga paghiliusa sa lebel nga luwas sa gubyrno agud makatipon sang suportang moral kag pangpulitika para sa rebolusyong Pilipino amo man para makaamot sa pag-uswag sang internasyunal nga kahublagan batuk sa imperyalismo kag tanan nga reaksyon.

Nagatinguha sang husto ang Partido para magpundar sang relasyon sa mga partido nga Marxista-Leninista. Maoista kag mamumu-

gon sa diwa sang proletaryo nga internasyunalismo kag sa mga partido sang pumuluyo, mga kahublagan sa pungsodnon nga paghilway kag mga organisasyon

sa diwa sang anti-imperyalista nga paghiliusa kag sandig sa polisiya sini sa internasyunal nga pagpakighiliugyong prente.

IV. Mapang-away nga mga katungdanan para sa tanan-nga-bahin nga pagsulong

Dapat himuon sang mga kadre kag katapu ang tanan agud tumanon ang mga mapang-away nga katungdanan sang mahal naton nga Partido kag mag-angkon sang signiipikante nga mga pagsulong sa rebolusyong Pilipino sa masunod nga tuig. Dapat naton siguruhon nga labi pa nga makapabakod ang Partido kag mag-ani sang mas madamu nga kadalag-an bilang abante nga destakamento sang proletaryado nga nagapamuno sa rebolusyong Pilipino kag nagaalagad sa pumuluyong Pilipino. Sa sini, maselebrar naton ang ika-40 anibersaryo sang Partido nga bug-os ang kasadya kag may labaw nga determinasyon para magsulong pa gid.

Sa ideolohiya, dapat naton padayunon nga bug-uson ang Partido sa ubay sang Marxismo-Leninismo-Maoismo. Dapat naton ini isapraktika sa pagtuon sang internasyunal kag lokal nga kahimtangan, sa pagsuma kag pag-analisa sa aton rebolusyonaryong inagihan, sa pagtasar sa aton hinimuan kag sa pagsaway kag pagsaway-sa-kaugalingon kag sa pagtalana sang mga katungdanan agud dugang pa nga magsulong.

Dapat kita nga magbantay batuk sa suhetibismo, rebisyunismo kag oportunismo kag batuk sa tanan nga petiburges nga tendensya nga anti-komunista nga ginasadag sang mga imperyalista kag lokal nga reaksyunaryo agud patalangan ang mga rebolusyunaryo. Dapat naton pataason ang lebel sang aton edukasyong teoritiko kag pangpulitika sa proseso sang mga pulong-pagtuon kag mga pulong nahanungod sa hilikuton sang mga yunit kag organo amo man sa mga pormal nga kurso sang edukasyon pangPartido.

Sa pulitika, dapat naton bilugon ang Partido paagi sa pagpatu-

man sa nagapamuno nga papel sini sa demokratiko nga rebolusyon sang banwa paagi sang malawigan nga inaway banwa. Dapat naton kaptan ang pangkabilugang linya pangpulitika kag pamatukan ang Tuo kag “Wala” nga oportunismo. Kaangot sini, kita nga mga kadre kag katapu dapat mapamaayo sa pagpatuman sa mga hilikuton sa mga yunit kag organo naton kag sa mga partikular nga linya sang hilikuton nga ginatalana sa aton.

Dapat naton pauswagon ang armadong paghimakas kag ang nagahiliugyong prente bilang mga armas sa paglutos sa kaaway kag sa pagpasulong sang rebolusyon. Paagi sang aton nga pangpulitika nga pagtinguha, dapat kita nga makarekrut sa Partido sang pinakamadamu nga kandidato nga katapu halin sa kubay sang mga aktibista sa mga organisasyong masa sang masang anakbalhas kag petiburgesyang urban.

Sa organisasyon, dapat naton bilugon ang Partido sandig sa prinsipyo sang demokratikong sentralismo kag pamatukan ang bukratismo kag ultra-demokrasya.

Ang aton Partido ara sa idalum sang sentralisado nga pagpamuno, nga amo man nakabase sa demokrasya. Sa nagkalain-lain nga lebel tubtub sa Komite Sentral, dapat naton siguruhon ang pagpamuno sang mga kadre nga may madalum nga panindugan sa rebolusyonaryong handum sang pumuluyo, may kaayo sa ideolohiya, pulitika kag organisasyon kag maayo magkuha sang datos kag mga husto nga ideya sa mga organisasyon nga ginapamunuan nila.

Dapat kita nga maghabig sang nagapadamu nga katapu halin sa mga rebolusyonaryong kahublagang masa. Dapat kita magrekrut sang daku nga numero sang mga mamumugon, mangunguma kag pamatan-on nga nakaeskwela halin sa mga organisasyong masa kag halin sa hangaway sang bamwa. Mas madamu nga katapu, mas malapad kag mas mabaskog ang base sang aton Partido agud maangkon ang lubos nga kadalagan sang demokratikong rebolusyon sang banwa kag masuguran ang rebolusyong sosyalista.

Sa paglunsar sang rebolusyonaryo nga armadong paghimakas, dapat naton pasunsumon ang mga taktikal nga opensiba batuk sa kaaway agud makaagaw sang dugang nga armas para sa pagtukod sang dugang nga mga yunit sang hangaway sang banwa kag pagpabaskog sa nagkalain-lain nga lebel sang kumand halin sa mga prenteng gerilya tubtub mga pangprubinsya kag pangrehiyon nga kumand. Kag labaw pa, tubtub sa pungsodnon nga kumand sa operasyon. Dapat kita makapapas sang mas madamu nga yunit sang pwersang kaaway agud makatipon

sang kusog kag eksperensya para makadugmok sang mas madamu pa tubtub masarangan na naton nga agawon ang gahum pangpulitika sa bilog nga pungsod.

Sa pagpakig-engkwentro, ginagamit naton ang aton kusog-palupok agud papason ang target nga yunit sang kaaway. Pero kon nadulaan na sang ikasarang nga magbato ang kaaway ukon hungod sila nga nagsurender, dapat sila nga tratuhon sang maayo kag dapat hatagan sang kinahanglanon medikal ang mga pilason sandig sa Mga Pagsulundan sa Disiplina sang BHB, Comprehensive Agreement on Respect for Human Rights and International Humanitarian Law (CARHRIHL) kag Geneva Conventions. Ginabatuan naton ang mga pwersa kag espiya sang kaaway agud itib-ong, pangapinan kag isulong ang kinamatarung kag interes sang pumuluyo. Dapat naton paturon nga pirme nga luwas ang mga sibilyan kag mga di kombatant.

Patimaan sang pagkilala sa aton *status of belligerency* (kahimtangan bilang soberano nga pwersa nga nagalunsar sang gera) sa idalum sang Geneva Conventions ang paglaum sang mga internasyunal nga ahensya kag iban pa nga mga entidad kag pati sang mga pwersa nga kaaway nga tahuron naton ang mga tawhanong-kinamatarung kag magasunod kita sa makatawo nga kondukta sa idalum sang internasyunal nga layi kag pauswagon naton ang sistemang ligal kag hudisyal sang demokratikong gubyrerno sang pumuluyo. Dapat naton kapitan ang kinamatarung sang sinoman nga akusado sa kinamatarung sang proseso sa pag-aresto, pangumpisa nga imbestigasyon kag pagbista sa mga suspetsado nga kriminal, nga may nagakaigo nga konsiderasyon sa seguridad sang rebolusyonaryong tinawo. Sa katapusan sang pagbista, dapat sumahon kag pagadesisyon ang kaso.

Sa mga kaso nga armado kag peligroso nga kriminal ukon mga suspek, dapat naton ipaathag sa publiko paagi sang pormal nga asunto kon ngaa posible nga engkwentruhon sila sang taga-aresto nga yunit sang hangaway sang banwa ukon milisya kon indi sila magsurender sa anuman nga awtoridad sang demokratiko nga gubyrerno sang pumuluyo.

Dapat kita magpatuman sang reporma sa duta bilang pangunahon nga kaundan sang demokratikong rebolusyon. Dapat kita magsulong halin sa minimum nga programa sa reporma sa duta padulong sa maksimum kag sa sini makapatuman sang rebolusyong agraryo sa pinakamadamu nga lugar nga ginatugot sang kahimtangan. Dapat naton arestuhon, imbestigahan, bistahon kag silutan ang mga despotiko nga agalon nga mayduta kag mga alagad nila nga nagalapas sa mga layi sang demokratikong gubyrerno sang banwa. Dapat naton lutuson ang mga pyudal nga mapanghimulos nga nagakontra sa polisiya sang reporma sa duta sang Partido kag rebolusyunaryo nga kahublagang masa.

Dapat naton dugangan ang numero sang mga prenteng gerilya kon sa diin posible agud batuan ang pagtinguha sang mga pwersa sang kaaway nga dumugon kag dugmukon ang pila ka prenteng gerilya sa kada natalana nga panahon. Dapat magtuhaw ang mga prenteng gerilya kag sa ulihi magalig-on nga baseng purok base sa pagpalapad kag nagapadalum nga baseng masa, pagdaku sang hangaway sang banwa, milisya kag mga yunit pangdepensa, kag paghanas sa mga kadre kag aktibistang masa sa nagkalain-lain nga aspeto sang kabuhi pangkatilingban.

Bunga sang "Wala" nga oportunistang mga kasaypanan sadto, lakip ang adbenturismo militar kag putsismo, dapat naton hatagan-

tum-ok ang mga krusyal nga aspeto sang pagtukod sang baseng masa pareho sang mapisan nga hilikuton pangmasa kag pagtukod sang mga organisasyong masa kag mga organo sang gahum pangpulitika. Pero kon natukod na ang mga ini, dapat pa naton pasanyugon ang pagtukod sang hangaway sang banwa, milisya kag mga yunit pangdepensa agud makapundar sang dugang nga armadong kusog kag kalig-on sa mga baseng gerilya ukon sa malig-on nga baseng purok.

Dapat naton gamiton ang aton armado nga kusog agud dugmukon ang gahum pangpulitika sang kaaway kag tabugon ang mga nagapamigos. Dapat naton bungkagon ang sobra nga gahum pang-ekonomya nga angkon sang mga nagapamigos nga ini sa porma sang dalagku nga kadutaan, plantasyon, minahan, trosohan kag iban pa nga mga empresa, luwas kon ang nagadumala sa mga kumpanya nga ini nagasunod sa mga polisiya kag layi sang gubyrerno sang pumuluyo kaangot sang rasonable nga pasweldo sa mga mamumugon kag pagbayad sang rebolusyonaryong buhis. Paagi sa mga organo sang gahum pangpulitika kag mga organisasyong masa, dapat pamunuan sang Partido ang tanan nga aspeto sang kabuhi pangkatilingban kag itransporma ang mga atrasado nga baryo pakadto sa mga balwarte pangpulitiika, pang-ekonomya kag pangkultura sang rebolusyon.

Dapat naton pauswagon ang rebolusyonaryong nagahiliugyon nga prente sa pungsodnon nga sakup. Sa sulod sang pungsodnon nga nagahiliugyong prente, dapat naton bug-uson ang antipyudal nga nagahiliugyong prente. Dapat makighiliusa kag pangunahon nga magsalig ang Partido kag proletaryado sa mga imol nga mangunguma kag mamumugon sa uma, habigon ang mga nahanunga nga mangunguma, nyutralisahan ang

manggaranon nga mangunguma kag hingalitan ang pagkatunga-tunga sang mga agalon nga mayduta agud ihamulag kag dugmukon ang gahum sang mga despotiko nga agalon nga mayduta kag mga alagad nila.

Dapat permi naton nga pat-uron nga malig-on ang sandigan nga alyansa nga mamumugon-mangunguma, ang alyansa sang mga progresibong pwersa kag ang alyansa sang mga patriyotikong pwersa. Sa sini, may aton nga malig-on nga tungtungan para mapalapad ang nagahiliugyong prente nga ginalakipan sang taktikal, mahuyang kag indi masaligan nga mga kaalyado sa mga sahing reaksyunaryo agud ihamulag sang husto kag dugmukon ang gahum sang pinakamalaut nga guban sang reaksyunaryo, nga subong amo ang guban Arroyo.

Dapat naton himuon ang tanan agud mapatalsik ang rehimeng Arroyo paagi sang malapad nga nagahiliugyon nga prente. Pero kon indi mapatalsik ang rehimeng Arroyo bangud indi maparalisa ukon madaug sang mga pwersang anti-Arroyo sa militar ang maki-Arroyo nga *chain of command*, ang pagtinguha sang nagahiliugyon nga prente para ihamulag kag paluyahon ang rehimeng Arroyo may benepisyo gihapon sa pagtuga sang kahimtangan pabor sa pagpabwelo sang mga taktikal nga opensiba sang BHB sa kaumhan. Kon mag-atake sang todo sa rehimen ang mga anti-Arroyo nga upisyal militar kag mapilitan ang rehimen nga magpakat sang mas madamu nga tropa sa pungsodnon nga kabisera kag iban pang syudad, mabuhinan ang mga sablag nga ginaatubang sang hangaway sang banwa sa paglunsar sang mga taktikal nga opensiba sa kaumhan.

Dapat magtigayon ang Partido sang epektibo nga hilikuton internasyunal para suportahan ang pumuluyong Pilipino sa ila paghimakas para sa pungsodnon nga kahilwayan kag demokrasya. Dapat naton pauswagon ang aton hilikuton sa kubay sang mga Pilipino nga mamumugon sa luwas sang pungsod, mga migrante kag ikaduha kag bag-o nga henerasyon sang mga Pilipino sa iban nga pungsod. Dapat naton

pauswagon ang ila interes sa pagpasingki sang paghimakas sang banwa batuk sa nagasanyog nga pagpanghimulos kag pagpamigos sang mga imperyalista kag mga reaksyunaryong Pilipino.

Dapat kita magpauswag sang pinakahugot nga angot sa mga partido nga Marxista kag magpanday sang relasyon sa iban pa nga dumuluong nga partido komunista kag mamumugon base sa Marxismo-Leninismo ukon anti-imperyalista nga paghiliusa. Dapat naton nga buyukon ang pagpakigrelasyon sang mga patriyotiko kag progresibong organisasyon kag institusyong Pilipino sa kapareho nga mga organisasyon sa luwas sang pungsod. Dapat permi kita nga aktibo sa pagsakdag sa internasyunal nga nagahiliugyong prente batuk sa imperyalismo kag tanan nga reaksyon kag sa pagpabaskog sang mga organisasyon kag kahublagan sa nagkalain-lain nga halambalanon sang paghimakas sang pumuluyo sang kalibutan para sa dugang nga kahilwayan, demokrasya, hustisya sosyal, kauswagan kag kalinungan pangkalibutanon.

Dapat naton hingalitan ang pagpakignegosasyon sa GRP indi lamang bilang dalan para agumon ang makatarungan nga kalinungan paagi sa mga reporma pakatilingban, pang-ekonomya kag pangpulitika kundi bilang pamaagi man para ipahibalo sa pumuluyo sang kalibutan ang kahimtangan kag makatarungan nga demanda sang pumuluyo nga Pilipino, kag sa sini makaangkon sang pangkalibutanon nga suporta para sa rebolusyong Pilipino. Gani may maayo nga ginahataga ang sugilanon pangkalinungan anuman ang kahimtangan subong ukon maabtan sini.

Dapat naton padayunon paagi sa NDFP ang pagtinguha nga angkunon ang pagkilala sa *status of belligerency* sang demokratikong gubyrerno sang pumuluyo kag sang rebolusyong pwersa sang pumuluyo. Dapat kita magpundar sang relasyon protodiplomatiko kag diplomatiko sa malawigan nga preparasyon para sa pagdaug sang demokratikong rebolusyon sang banwa kag pagtukod sang Demokratikong Republika sang Pilipinas. AB



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Ispesyal nga Isyu
Disyembre 26, 2007
www.philippinerevolution.org

Padasigong ang rebolusyonaryo nga pagsulong sang PKP para sa pagselebrar sang ika-40 anibersaryo sini


Mensahe sang Komite Sentral sang Partido Komunista sang Pilipinas

Walay tupong ang kasadya naton sa pagsaulog sang ika-39 nga anibersaryo sang liwat nga pagtukod sang Partido Komunista sang Pilipinas (PKP) sa teoritiko nga ubay sang Marxismo-Leninismo-Kaisipang Mao Zedong (Maoismo) sadtong Disyembre 26, 1968. Umpisa sadto, ang pinakamahal naton nga Partido napanday sa kalayo sang rebolusyonaryo nga paghimakas kag nakatipon sang mabulawanon nga kadalag-an sa pagtungod sini bilang abante nga gwardya sang proletaryado kag sa pagpamuno sa paghimakas sang pumuluyong Pilipino para sa pungsodnon nga kahilwayan kag demokrasya batuk sa imperyalismong US kag lokal nga mga nagapanghimulos nga sahing kumprador kag agalon nga mayduta.

Labing mataas nga pagpasidungog ang ginahatag naton sa aton mga rebolusyonaryong martir kag baganihan para sa ila pinakamataas nga sakripisyo kag tuhay-sa-iban nga pag-alagad sa banwa. Nagasaludo kita sa tanan nga kadre kag katapu sang Partido, mga rebolusyonaryong pwersa kag pumuluyo sa ila pagtinguha kag mga sakripisyo sa rebolusyonaryong paghimakas. Nag-ani kita sang dalagku nga kadalag-an bangud wala kita mag-atras sa pag-atubang sa mabaskog nga hangkat ukon sang mga kasaypanan kag kakulangan. Nagbaskog kita sa pagpangibabaw sa mga peligro kag kabudlayan, sa pagsaway kag pagsaway-sa-kaugalingon kag

pagtadlong sang mga kasaypanan kag kakulangan.

Ululupod naton nga palig-unon ang aton determinasyon nga isulong ang pungsodnon-demokratikong halintang sang rebolusyong Pilipino paagi sang malawigan nga inaway banwa. Determinado kita nga hilubson ang halintang nga ini paagi sang pag-agaw sa gahum pangpulitika sa bug-os nga pungsod agud malab-ot ang halintang sang sosyalismo kag masuguran ang mahaba nga panahon sang transisyon padulong sa komunismo. Sa gilayon, buot naton pagahandaan ang pagsaulog sang ika-40 anibersaryo sang Partido sa maabot nga tuig paagi sang pagpadasig sa tanan-nga-bahin nga pagpasulong sa rebolusyonaryong paghimakas sang



Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com